

114 年全國語文競賽臺灣客語朗讀文章國小學生組（四縣腔）

編號 3 號

【今年个避暑】黃秋枝原作

又到了一年一擺个避暑。佢聽著吾姆同吾爸偷偷仔講：「校門開，比鬼門開還較得人驚！」

因爭，阿姆平常時愛上班，還愛安排佢三姊妹个避暑生活，恁著頭那就怖怖！吾爸同吾姆參詳，為著居家安全就請「年休」輪等來看顧佢兜。

初下碼，大家都當享受著避暑，毋使耽早床、毋使赴時間去學校讀書、毋使日日寫功課，毋使這毋使該个自由自在。毋過，看吾爺哀嘎變到比平常時上班還較無閒，毋輸路口該間便利商店个電子門「叮咚、叮咚」，一日二十四點鐘个無閒。

「阿姆，等一下佢愛食麼个？」「天光日愛去哪寮？」「阿爸，老弟又同老妹相搶玩具吔！」雖然講，避暑佢兜在屋下个齣事當多，毋過阿爸阿姆還係試著，佢兜係佢兩儕个「甜蜜負擔」，全力安排佢兜个假期行程同避暑學習，看重幸福親子个時間，吾个爺哀付出了當大心理負擔摻體力个挑戰。

佢座大，今年正在小學畢業。

有一日，一通電話：「帶轉來避暑啦！」隔日，阿爸阿姆就

載等佢三姊妹，轉到莊下个姐婆屋下。

姐婆个屋下歇在苗栗矮山仔腳下，屋舍个四圍係平洋洋仔、闊野野个田，田鄰堵好當在該割六月禾，割禾機行過禾行，食忒了成串成串个禾串，又哋出一袋一袋个粒粒金黃，裝袋上車了後就載去糶溼穀。獨獨輪到姐公个田頭，姐公愛留兜溼穀轉載屋面前个禾埕晒，講愛自家留來做伙食，又講分日頭晒過个穀，精出來个米，煮个飯會較香、較虬、較好食！

斷真，「六月天公無阿公，六月割禾無阿婆。」姐婆無時間，蕩耙¹擎等，當當在日頭下个禾埕項，從頭接二蕩去蕩轉，看起來盡生趣又辛苦。該畫面隨分佢想著：「鋤禾日當午，汗滴禾下土；誰知盤中飧²，粒粒皆辛苦。」該係眼前目珠頭看得著个真情實景同感受。

老古人言「一粒米，百粒汗。」佢想，在佢享受著恁多人付出心神摻體力个同時，除忒愛感恩現下个幸福生活，乜愛做惜各種食物摻物品，毋好耗爽浪費，並試試啊愛曉得付出自家个關心同煞猛，分身邊个人更加幸福同圓滿正著。

¹ 蕩耙：音 tong pa^ˇ；農具，丁字耙。

² 飧：音 sun^ˇ；煮熟的飯菜。

114年全國語文競賽臺灣客語朗讀文章國小學生組（四縣腔）

編號 6 號

【水板仔】李文煥原作

朋友對臺南帶來當有名个「麻豆碗板」，食个時節愛淋合好个甜辣醬，咬落去逐口都有肉末仔同鹹卵黃，食起來異有在地風味。毋過，佢心肚个最愛，還係佢客家个傳統美食——水板仔。該單純又虬个口感，分佢發夢都會尋味。該係佢童年个味緒，乜係家鄉个味緒，碗肚承等个毋單淨係水板仔，還係時光个影跡。

風定定仔吹過熟事个巷仔，水板仔微微个香氣，就像時光个送信人，輕輕仔推醒牽覺个回憶。三十零年前，苗栗市个朝晨總會分一聲聲「水板仔哦！水板仔哦！」个聲喊醒。該係賣水板仔个阿姨嬌嬌个聲音，佢逐日會戴等笠嫲蒙等面帕，揸等兩籬淦淦个水板仔，行過莊頭巷尾滿哪仔去賣。佢單淨賣兩種口味个水板仔，一種係鹹个白水板仔，面頂鋪等切幼幼个快菜、蘿蔔乾同豆腐乾。另外一種係甜个水板仔，該係攤赤砂糖去做个，面頂麼个就無放，毋過該甜甜个味緒，顛倒係佢盡好食个口味。

其實，水板仔毋管係鹹个抑係甜个，一旦都係佢盡好个米食。做麼个佢會對水板仔恁合意呢？可能係胎教造成个，識聽阿姆講佢大肚屎擱个時節，發子到當嚴重，食麼个就翻麼个，翻

到連黃膽水都設出來。阿爸為著阿姆病子食毋落，一日一日瘦肉下去，愁慮到睬睬踏踏，毋知愛仰結煞正好。好得有一日，水板仔阿姨堵好揸擔經過喊：「水板仔哦！好食个水板仔哦！」阿爸心想：「甘願過錯，毋願錯過。水板仔雖然無麼个，但係有食總比無食好。」煞煞就去買咧兩碗水板仔，堵造化看阿姆食得落無？

麼个山珍海味都食毋落个阿姆，竟然看著水板仔就口涎水落落跌，兩下半就拂到淨淨，全全無發子个現象。該日開始，阿姆就逐日等等水板仔阿姨，揸來正蒸好萋萋个水板仔，一直食到膠佢降出來為止，故所頭擺佢還分人笑係「水板仔子」。

水板仔，毋單淨係一種食物，佢還係一段情感个載體。見擺佢食一口水板仔，就像係穿越時空，轉到該無愁慮个年代，轉到該阿姨个擔脣，轉到該溫情个屋下。在這個緊板个生活裡肚，水板仔係佢心靈个安慰，係佢記憶中永遠个甜。